

T7903/1129(7)

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

07

14 OCT 1951



證治準繩第四冊目錄

諸痛門

頭痛

偏頭風 雷頭風 眉稜骨痛 頭搖

真頭痛 頭風屑

犬頭痛 頭重

面痛

頸項強痛

心痛胃脘痛

膈痛 心痞

胸痛

腹痛

少腹痛

脇痛

腰痛

腎着 脊軟

腰膝痛

脊痛脊強

肩背痛

臂痛

哈佛大學哈佛燕京圖書館珍藏印



身體痛

注維四目金  
身體拘急

痿痺門

痺

行痺

即走注疼痛

痛痺

即痛風

着痺

即麻木

痿

痿厥

脚氣

證治準繩第四冊

金壇王肯堂輯

頭痛

偏頭風  
眉稜骨痛

雷頭風

大頭天行

頭風屑

頭重

頭搖

醫書多分頭痛頭風為二門然一病也但有新

久去留之分耳淺而近者名頭痛其痛卒然而

至易於解散速安也深而遠者為頭風其痛作

止不常愈後遇觸復發也皆當驗其邪所從來

而治之 世俗治頭痛不從風則從寒安知其

有不一之邪乎試考內經論頭痛所因以明之



如風從外入振寒汗出頭痛新沐中風爲首風  
當先風一日頭痛不可以出內大寒內至骨髓  
髓以腦爲主腦逆故頭痛齒亦痛少陽司天之  
政初之氣風勝乃搖候乃大濕其病氣怫於上  
頭痛二之氣火反鬱白埃四起其病熱鬱於上  
頭痛少陽司天火淫所勝民病頭痛發熱惡寒  
如瘧歲金不及炎火乃行復則陰厥且格陽反  
上行頭腦戶痛延及腦頂發熱太陽之勝熱反  
上行頭項頂巔腦戶中痛目如脫太陽之復心

痛痞滿頭痛太陰司天濕淫所勝腰脊頭項痛  
時眩太陰在泉濕淫所勝病衝頭痛目似脫項  
似拔太陰之復頭項痛重而掉憊尤甚陽明之  
復欬噦煩心病在膈中頭痛傷寒一日巨陽受  
之頭項痛腰脊強靈樞謂風痺股脛爍足如履  
水時如入湯煩心頭痛時眩悲恐短氣不出三  
年死凡此皆六氣相侵與清陽之真氣相薄而  
痛者也至於頭痛甚則腦盡痛手足寒至節死  
頭痛巔病下虛上實注以腎虛不能引膀胱之



氣故爾心煩頭痛耳鳴九竅不利腸胃之所生  
心熱病者卒心痛煩悶頭痛面赤刺手少陰太  
陽肺熱病者頭痛不堪汗出而寒刺手太陰陽  
明腎熱病者項痛員員澹澹然刺足少陰太陽  
靈樞謂厥頭痛面若腫起而煩心取足陽明太  
陰厥頭痛頭脉痛心悲善泣取血與厥陰厥頭  
痛貞貞頭重而痛取手足少陰厥頭痛意善忘  
按之不得取頭面左右動脉後取足太陰厥頭  
痛項先痛腰脊爲應先取天柱後取足太陽厥

頭痛頭痛甚耳前後脉湧有熱瀉出其血後取  
足少陽頭痛不可取於膺者有所擊墮惡血在  
於內若肉傷痛未已可側取不可遠取也頭痛  
不可刺者大痺爲惡日作者可令少愈不可已  
頭半寒痛先取手少陽陽明後取足少陽陽明  
膀胱足太陽所生病頭顛頂腦戶中痛膽足少  
陽所生病頭痛凡此皆藏府經脉之氣逆上亂  
於頭之清道致其不得運行壅遏經隧而痛者  
也蓋頭象天三陽六府清陽之氣皆會於此三



陰五藏精華之血亦皆注於此於是天氣所發  
六淫之邪人氣所變五賊之逆皆能相害或蔽  
覆其清明或瘀塞其經絡因與其氣相薄鬱而  
成熱則脉滿滿則痛苦若邪氣稽留則脉亦滿而  
氣血亂故痛甚是痛皆爲實也若寒濕所侵雖  
真氣虛不與相薄成熱然其邪客於脉外則血  
泣脉寒寒則脉縮卷緊急外引小絡而痛得温  
則痛止是痛爲虛也如因風木痛者則抽掣惡  
風或有汗而痛因暑熱痛者或有汗或無汗則

皆惡熱而痛因濕而痛者則頭重而痛遇天陰  
尤甚因痰飲而痛者亦頭昏重而痛憤憤欲吐  
因寒而痛者絀急惡寒而痛各與本藏所屬風  
寒濕熱之氣兼爲之狀而痛更有氣虛而痛者  
遇勞則痛甚其脉大有血虛而痛者善驚惕其  
脉芤用是病形分之更兼所見證察之無不得  
之矣 東垣曰金匱真言論云東風生於春病  
在肝俞在頸項故春氣者病在頭又諸陽會於  
頭面如足太陽膀胱之脉起於目內眥上額交



巔直入絡腦還出別下項病則衝頭痛又足少陽膽之脉起於目銳眦上抵頭角病則頭角額痛夫風從上受之風寒傷上邪從外入客經絡令人振寒頭痛身重惡寒治在風池風府調其陰陽不足則補有餘則瀉汗之則愈此傷寒頭痛也頭痛耳鳴九竅不利者腸胃之所生乃氣虛頭痛也如氣上不下頭痛巔疾者下虛上實也過在足少陰巨陽甚則入腎寒濕頭痛也有厥逆頭痛者所犯大寒內至骨髓髓以腦為主

腦逆故令頭痛齒亦痛有心煩頭痛者病在膈中過在手巨陽少陰乃濕熱頭痛也 凡頭痛皆以風藥治之者總其大體而言之也高巔之上惟風可到故味之薄者陰中之陽自地升天者也然亦有三陰三陽之異 太陽經頭痛惡風寒脉浮緊川芎獨活之類為主 少陽經頭痛脉弦細往來寒熱用柴胡黃芩主之 陽明經頭痛自汗發熱不惡寒脉浮緩長實者升麻葛根石膏白芷主之 太陰經頭痛必有痰體



重或腹痛為痰癖脉沉緩者蒼朮半夏南星主之  
少陰經頭痛三陰三陽經不流行而足寒氣逆為寒厥其脉沉細麻黃附子細辛湯主之  
厥陰經頭疼項痛或吐痰沫冷厥其脉浮緩吳茱萸湯主之  
三陽頭痛藥羌活防風荆芥升麻葛根白芷柴胡川芎芍藥細辛葱白連鬚  
陰證頭痛只用温中藥如理中薑附之類 風濕熱頭痛上雍損目及腦痛偏正頭痛年深不愈並以清空膏主之如苦頭痛每料中加細辛

二錢如太陰脉緩有痰名曰痰厥頭痛去羌活防風川芎甘草加半夏一兩半如偏頭痛服之不愈減羌活防風川芎一半加柴胡一倍如發熱惡熱而渴此陽明頭痛只與白虎湯加白芷丹溪云東垣清空膏諸般頭痛皆治惟血虛頭痛從魚尾相連痛者不治又云治少陽頭痛如痛在太陽厥陰者勿用蓋謂頭顛痛也 頭旋眼黑頭痛宜安神

散川芎散 熱厥頭痛雖嚴寒猶喜風寒微來暖處或見煙火其痛復作宜清上瀉火湯後用補氣湯 風熱頭疼石膏散荆芥散 冬月大



寒犯腦令人腦痛齒亦痛名曰厥逆出奇病論  
 中宜羌活附子湯 頭痛胸中痛 減少咽嗑  
 不利寒冷脉左寸弦急宜麻黃吳茱萸湯 濕  
 熱在頭而頭痛者必以苦吐之輕者用透頂散  
 搐鼻取涎 新沐中風為首風頭面多汗惡風  
 當先風一日則病甚至其風日則少愈大川芎  
 丸主之 風氣循風府而上則為腦風項背怯  
 寒腦戶極冷神聖散主之 凡治頭痛皆用芎  
 芷羌防等辛溫氣藥升散者由風木虛不能升

散而土寡於畏得以壅塞而痛故用此助肝木  
 散其壅塞也若風盛踈散太過而痛服辛散藥  
 反甚者則宜用酸澀收而降之乃愈乳香蓋落  
 散之類是也已上 頭痛耳鳴九竅不利腸胃  
 之所生東垣以為此氣虛頭痛也用人參黃芪  
 主之 羅謙甫治栢參謀六十一歲先患頭昏  
 悶微痛醫作傷寒解之汗出後痛轉加復汗解  
 病轉加而頭愈痛每召醫用藥雷同到今痛甚  
 不得安卧惡風寒不喜飲食脉弦細而微氣短



促嬾言語經曰春氣病在頭今年高氣弱清氣不能上升頭面故昏悶此病本無表邪因發汗數四清陽之氣愈虧損不能上榮亦不能外固所以病增甚宜升陽補氣頭痛自愈製順氣和中湯經曰陽氣者衛外而為固也誤汗之衛外之氣損故黃芪甘溫補衛實表為君人參甘溫補氣當歸辛溫補血芍藥味酸收衛氣為臣白朮陳皮炙甘草苦甘溫養衛氣生發陽氣上實皮毛腠理為佐柴胡升麻苦辛引少陽陽明之

氣上升通百脉灌溉周身者也川芎蔓荊子細

辛辛溫體輕浮清利空竅為使一服減半再服

全愈 血虛頭痛自魚尾眉尖後近髮際曰魚尾上攻頭

痛當歸川芎主之 當歸一兩酒一升煮取六

合飲至醉効 當歸川芎連翹熟芩各二錢水

煎去渣入龍腦薄荷末二錢乘沸泡之鼻吸其

氣候溫即服服即安卧効 氣血俱虛頭痛者

於調中益氣湯加川芎蔓荊子細辛其効如神

痰厥頭痛眼黑頭旋惡心煩亂半夏白朮天



麻湯主之痰厥頭痛非半夏不能療眼黑頭旋風虛內作非天麻不能解天麻苗謂之定風草獨不爲風所搖以治內風之神藥內風者虛風是也黃芪甘溫瀉火補元氣實表虛止自汗人參甘溫調中補氣瀉火二朮甘溫除濕補中益氣澤瀉茯苓利小便導濕橘皮苦溫益氣調中而升陽炒麩消食蕩胃中滯氣麥芽寬中助胃氣乾薑辛熱以滌中寒黃蘗苦寒用酒洗以療冬日少火在泉而發躁也 東垣壯歲病頭痛

每發時兩頰盡黃眩暈目不欲開嬾於言語身體沉重兀兀欲吐數日方過潔古老人曰此厥陰太陰合而爲病名曰風痰宜以局方玉壺丸治之可加雄黃白朮以治風濕更有水煮金花丸灸俠溪二穴各二七壯不旬日愈 鼻鼽腹腫頭痛病在胃經云陽明所謂客孫脉則頭痛鼻鼽腹腫者陽明并於上上者則其孫絡太陰也故頭痛鼻鼽腹腫也 動作頭重痛熱氣潮者屬胃 丹溪云頭痛如破酒炒大黃半兩茶



煎服 婁全善云病在胃而頭痛者必下之方  
愈也如孫兆以利膈藥下張學士傷食頭痛郭  
茂恂以黑龍丹下其嫂產後汚血頭痛皆下咽  
卽安是也 心煩頭痛病在膈中過在手巨陽  
少陰東垣清空膏之類治之 頭痛巔病下虛  
上實過在足少陰巨陽甚則入腎許學士謂之  
腎厥頭痛也其脉舉之則弦按之則堅用玉真  
丸治之戴復菴用正元散或大三五七散入鹽  
煎服或於正元散內入炒椒十五粒下來復丹

間進黑錫丹有服諸藥不効其痛愈甚宜茸硃  
丹 素問曰頭疼巔疾下虛上實過在足少陰  
巨陽甚則入腎狗蒙招尤目眩耳聾下實上虛  
過在足少陽厥陰甚則入肝下虛者腎虛也故  
腎虛則頭痛上虛者肝虛也故肝虛則頭暈狗  
蒙者如以物蒙其首招搖不定目眩耳聾皆暈  
之狀也故肝厥頭暈腎厥巔痛不同如此肝厥  
宜釣藤散 傷食頭痛胸膈痞塞噯酸噫敗卵  
臭畏食雖發熱而身不痛宜治中湯加砂仁一



錢或紅丸子 傷酒頭痛惡心嘔吐出宿酒昏  
胃眩暈宜葛花解醒湯 怒氣傷肝及肝氣不  
順上衝於腦令人頭痛宜沉香降氣散并蘇子  
降氣湯下養正丹 上熱頭目赤腫而痛胸膈  
煩悶不得安卧身半已下皆寒足筋尤甚大便  
微秘宜既濟解毒湯 外有臭毒頭痛一味喫  
炒香附愈 頭痛連睛痛石膏鼠粘子炒爲末  
茶清食前調下 頭風搖鼻白芷散川芎散如  
金散瓜蒂神妙散火筒散鬱金散

**偏頭風**

頭半邊痛者是也丹溪云有痰者多

左屬風荆芥薄荷 左屬血虛川芎當歸 右

屬痰蒼朮半夏 右屬熱黃芩 川芎散 細

辛散 葶撥猪膽搐鼻中 葶麻子半兩去皮

大棗十五枚去核右共搗令熟塗紙上用筋一

隻捲之去筋納鼻中良久取下清涕卽止 生

蘿蔔汁仰卧注鼻中左痛注右右痛注左 一

婦人患偏頭痛一邊鼻塞不聞香臭常流清涕

時作臭氣服徧治頭痛藥如芎蝎等皆不効後



一醫人教服局方芩犀丸不十數服忽作噴突  
出一錠稠膿其疾遂愈

**雷頭風**頭痛而起核塊者是也或云頭如雷之

鳴也為風邪所客風動則作聲也夫治雷頭

風諸藥不効者證與藥不相對也夫雷者震也

震仰盂故東垣製藥用荷葉者象震之形其色

又青乃迷類象形當煎局方中升麻湯主之名

曰清震湯張子和用茶調散吐之次用神芎

丸下之然後服烏荆丸及愈風餅子之類衰者

用涼膈散消風散熱頭上赤腫結核或如酸

棗狀用排針出血則愈亦有因痰火者痰生

熱熱生風故也痰火上升壅於氣道兼乎風化

則自然有聲輕如蟬鳴重如雷聲故名雷頭風

也用半夏牙皂薑汁大黃酒浸透濕紙包煨再

白殭蠶連翹橘紅桔梗天麻各五錢片苓酒炒薄

荷葉三錢白芷青礞石粉草各一錢末之水浸蒸餅

丸如菴荳大食後臨卧茶吞二錢以痰利為度

然後用清痰降火煎藥調理



**真頭痛** 天門真痛上引泥丸夕發旦死旦發夕死為腦為髓海真氣之所聚卒不受邪受邪則死不可治古方云與黑錫丹灸百會猛進參沉烏附或可生然天柱折者亦難為力矣

**大頭痛** 頭腫大如斗是也是天行時疫病 東垣監濟源稅時長夏多疫癘初覺憎寒體重次傳面目腫盛目不能開上喘咽喉不利舌乾口燥俗云大頭天行親戚不相訪問如染之多不救張縣丞亦患此醫以承氣湯加藍根下之稍

緩翼日其病如故下之又緩終莫能愈漸至危篤東垣診視具說其由曰夫身半已上天之氣也身半已下地之氣也此雖邪熱客於心肺之間上攻頭而為腫盛以承氣下之瀉胃中之實熱是誅罰無過殊不知適其病所為故遂處方用黃連黃芩味苦寒瀉心肺間熱以為君橘紅玄參苦寒生甘草甘寒瀉火補氣以為臣連翹鼠粘子薄荷葉苦辛平板藍根味甘寒馬屁勃白殭蠶味苦平散腫消毒定喘以為佐新升麻



柴胡苦平行少陽陽明二經不得伸桔梗味辛  
溫爲舟楫不令下行共爲細末用湯調時時服  
之拌蜜爲丸噲化服盡良愈乃施其方全活甚  
衆名普濟消毒飲子 海藏云大頭病者雖在  
身半已上熱伏於經以感天地四時非節瘟疫  
之氣所着以成此疾至於潰裂膿出而又染他  
人所以謂之疫癘也大抵足陽明邪熱太甚實  
資少陽相火爲之熾多在少陽或在陽明甚則  
逆傳視其腫勢在何部分隨其經而取之濕熱

爲腫木盛爲痛此邪發於首多在兩耳前後所  
先見出者爲主爲根治之宜早藥不宜速恐過  
其病所謂上熱未除中寒已作有傷人命矣此  
疾是自外而之內者是爲血病況頭部分受邪  
見於無形之處至高之分當先緩而後急先緩  
者謂邪氣在上着無形之部分既着無形所傳  
無定若用重劑大瀉之則其邪不去反過其病  
矣雖用緩藥若又急服之或食前或頓服咸失  
緩體則藥不能除病矣當徐徐瀆無形之邪或



藥性味形體據象服餌皆須不離緩體及寒藥  
或酒炒浸之類皆是也後急者謂前緩劑已經  
高分瀉邪氣入於中是到陰部染於有形質之  
所若不速去反損陰也此却爲客邪當急去之  
是治客以急也且治主當緩者謂陽邪在上陰  
邪在下各爲本家病也若急治之不惟不能解  
其紛而反致其亂矣此所以治主當緩也治客  
當急者謂陽分受陽邪陰分受陰邪主也陰分  
受陽邪陽分受陰邪客也凡所謂客者當急去

之此治客以急也 假令少陽陽明之爲病少  
陽爲邪者出於耳前後也陽明者首面大腫也  
先以黃芩黃連甘草通炒過剉煎少少不住服  
呷之或服畢再用大黃或酒浸或煨又以鼠粘  
子新瓦上炒香吹咀煎去渣內芒硝各等分亦  
細細呷之當食後用徐得微利及邪氣已只服  
前藥如不已再服後藥依前次第用之取大便  
利邪已卽止如陽明渴者加石膏少陽渴者加  
瓜蒌根湯陽明行經加升麻葛根芍藥之類太



陽行經加羌活防風荆芥之類選而加之並與  
上藥均合不可獨用散也 黑白散 甘桔湯  
加鼠粘子連翹大黃玄明粉白殭蠶荆芥 殭  
蠶一兩錦紋大黃二兩薑汁丸彈子大新汲泉  
水和生蜜調服 外用井底泥調大黃芒硝末  
敷之

**眉稜骨痛**眉骨者目系之所過上抵於腦為目  
屬於腦也若諸陽經或挾外邪鬱成風熱毒上  
攻於頭腦下注於目睛遂從目系過眉骨相併

而痛若心肝壅熱上攻目睛而痛則亦目系與  
眉骨牽連併痛若胸膈風痰上攻者亦然若太  
陰之勝濕氣內鬱寒迫下焦痛留項互引眉間  
其痛有酸者有抽掣者有重者有昏悶者便可  
審是孰氣之勝也 東垣選奇湯治眉骨痛不  
可忍神效 丹溪云屬風熱與痰治類頭風風  
熱者宜祛風清上散因痰者二陳湯加酒黃芩  
白芷因風寒者羌烏散 戴云眼眶痛有二證  
皆屬肝 有肝虛而痛纔見光明則眼眶骨痛



甚宜生熟地黄丸 有肝經停飲發則眉稜骨痛不可開晝靜夜劇宜導痰湯或小芎辛湯加半夏橘紅南星茯苓

**頭風**

羅謙甫云肝經風盛木自搖動尚書云滿招損老子云物壯則老故木陵脾土金來尅之是子來爲母復仇也使梳頭有雪皮見肺之證也肺主皮毛大便實瀉青丸主之虛者人參消風散主之 萬病紫苑丸治頭多白屑每服三丸至五七丸薑湯下 按上治法必有風

熱上攻頭目眩痛諸證而後用之若止是白屑但宜白芷零陵香之屬外治而已

**頭重**

何因得之曰因天之濕淫外着也因人之

濕痰上蒸也因在下之陰氣逆於上也皆得而頭重何以言之頭象於天其氣極清地氣重濁地者陰也土濕也若外着內蒸必壅蔽清道致氣血不利沉滯於經隧脉絡故重內經曰陽氣者因於濕首如裹是外濕蔽着者也又曰脾熱病者先頭重是胃脉引其熱上於頭也太陰之



復飲發於中濕氣內逆太陽上留而重痛胸中  
掉瘳尤甚太陽之勝濕氣內鬱亦頭重巨陽之  
厥腫首頭重發為狗什靈樞謂督脉之别名曰  
長強挾脊上項散頭上下當肩胛左右别走太  
陽虛則頭重高搖之俠脊之有過者取之所别  
也 東垣云頭重如山此濕氣在頭也紅豆散  
鼻內搐之 又方羌活根燒連翹各三錢紅豆半錢  
右為末搐鼻 為飲除濕藥則過病所誅罰無  
過故於鼻取之猶物在高巔之上必射而取之

也 丹溪云壯實人氣實有痰或頭痛或眩暈  
大黃酒浸三次為末茶調服

**頭搖** 風也火也二者皆主動會之於巔乃為

搖也內經曰狗蒙招尤目瞑耳聾下實上虛過  
在足少陽厥陰註謂狗疾也蒙目不明招掉搖  
不定也尤甚也目疾不明首掉尤甚又太陰之  
復頭項痛重掉瘳尤甚註謂濕氣內逆太陽上  
留胸中而掉瘳也靈樞謂督脉之別長強虛則  
頭重高搖之然病機有謂諸風掉眩皆屬肝木



夫頭之巔足太陽之所過督脉與厥陰之所會  
是故三經所逆之火留聚於此者皆從風木而  
為掉搖也張仲景又言心絕者亦直視搖頭也  
**診** 寸口之脉中手短者曰頭痛 推而下之  
下而不上頭頂痛 寸口緊急或短或弦或浮  
皆頭痛 浮滑為風痰易治 短濇難治 浮  
緊為太陽 弦細少陽 浮緩長陽明 沉緩  
太陰 沉細少陰 浮緩厥陰 浮弦為風  
浮洪為火 右寸滑或大或弦而有力皆痰火

積熱而細或緩兼體重者濕 左脉不足血虛  
右脉不足氣虛 左右俱不足氣血俱虛  
右寸緊盛食積 右關洪大為胃熱上攻 寸  
口弦細為鬲上有風涎冷痰或嘔吐 沉細為  
陰毒傷寒但頭痛身不熱也 以診頭痛目痛久  
視無所見者死 正病苦頭痛目痛脉急短濇死



面痛

面痛皆屬火蓋諸陽之會皆在於面而火陽類也心者生之本神之變其華在面而心君火也暴痛多實久痛多虛高者抑之鬱者開之血熱者涼血氣虛者補氣不可專以苦寒瀉火爲事許學士醫檢正患鼻頰間痛或麻痺不仁如是數年忽一日連口唇頰車髮際皆痛不開口言語飲食皆妨在頰與頰上常如糊手觸之則痛此足陽明經絡受風毒傳入經絡血凝滯而



不行故有此證或以排風小續命透髓丹之類與之皆不効製犀角升麻湯贈之數日愈夫足陽明胃也經云腸胃爲市又云陽明多血多氣胃之中腥羶五味無所不納如市廛無所不有也以其腐熟飲食之毒聚於胃此方以犀角爲主解飲食之毒也陽明經脉環唇挾舌起於鼻合頰中循頰車上耳前過客主人循髮際至頭顱今所患皆一經絡也故以升麻佐之餘藥皆滌除風熱升麻黃芩專入胃經 老母年七十

餘累歲患頰車痛每多言傷氣不寐傷神則大發發之劇則上連頭下至喉內及牙齦皆如針刺火灼不可手觸乃至口不得開言語飲食並廢自覺火光如閃電尋常涎唾稠粘如絲不斷每勞與餓則甚得卧與食則稍安知其虛也始以清胃散犀角升麻湯人參白虎湯羌活勝濕湯加黃芩甘桔皆不効後改用參芪白朮芎歸升柴甘桔之類稍佐以苓梔連翹黍粘空腹進之而食遠則服加減甘露飲始漸安第老人性



躁不耐聞勞與多言時有之不能除去病根然  
 發亦稀少即發亦不如往歲之劇矣 從子鋸  
 因喪子鬱結復多餌鹿角膠諸種子藥或於食  
 後臨卧輒進之以至積成胃熱遂患面痛如老  
 母證服清胃散甘露飲大加石膏過當而見虛  
 證又服參耆等補藥過當而復見火證門人施  
 生以越鞠加山梔連翹貝母橘紅之屬開其鬱  
 結而始向安 諸方書無面痛門今補之且具  
 載上三條以見用藥不可執一耳非三條之足

以盡是病也痛

經云東風生於春病在肝論在頸項 諸瘕項



頸項強痛

經云東風生於春病在肝筋在頸項 諸瘕項

強皆屬於濕 缺盆之中任脉也名曰天突缺當

盆中央 一次任脉側之動脉足陽明也名曰

人迎挾喉兩 二次脉手少陽也名曰扶突挾

動脉是 三次脉手太陽也名曰天牕喉

動脉之後曲頰 四次脉足少陽也名曰天容曲

之前一寸後是 五次脉手少陽也名曰天牖耳後當

手陽明之後 六次脉足太陽也名曰天柱挾項大 七次

黃真

三

三



脉頸中央之脉督脉也名曰風府 足陽明挾  
喉之動脉也其膈在膺中 手陽明次在其膈  
外不至曲頰一寸 太陽當曲頰 足少陽在  
耳下曲頰之後 手少陽出耳後上加完骨之  
上 足太陽挾項大筋之中 然則頸項強急  
之證多由邪客三陽經也寒搏則筋急風搏則  
筋弛左多屬血右多屬痰 頸項強急發熱惡  
寒脉浮而緊此風寒客三陽經也宜驅邪湯  
頸項強急動則微痛脉弦而數實右為甚作痰

熱客三陽經治宜消風豁痰湯 頸項強急動  
則微痛脉弦而濇左為甚作血虛邪客太陽陽  
明經治宜疎風滋血湯 頸項強急寒熱往來  
或嘔吐或脇痛宜小柴胡湯升麻防荆湯 頸  
項強急腰似折項似拔加味勝濕湯 精神短  
少不得睡項筋腫急難伸禁甘温宜苦寒養神  
湯主之 本事方椒附散治腎氣上攻項背不  
能轉側於虛寒者為宜 丹溪治一男子項強  
不能回顧動則微痛其脉弦而數實右手為甚



作痰客太陽經治之用二陳湯加酒洗黃芩羌活紅花服後二日愈 許學士治一人患筋急項不得轉側自午後發至黃昏時定此患必從足起經言十二經絡各有筋惟足太陽之筋自足至項大抵筋者肝之合也日中至黃昏天之陽陽中之陰也又曰陽中之陰肺也自離至兌陰旺陽弱之時故靈寶畢法云離至乾腎氣絕而肝氣弱肝腎二藏受陰氣故發於是時授以木瓜煎方三服而愈 戴云頸痛非是風邪即

是氣挫亦有落枕而成痛者並宜和氣飲食後服 按人多有挫閃及久坐失枕而致項強不可轉移者皆由腎虛不能生肝肝虛無以養筋故機關不利宜六味地黃丸常服 內經刺灸項頸痛有二 其一取足手太陽治項後痛經云足太陽之脉是動則病項如拔視虛盛寒熱陷下取之又云項痛不可俛仰刺足太陽不可以顧刺手太陽又云大風項頸痛刺風府風府在上椎又云邪客於足太陽之絡令人頭項肩



經五身痛·  
痛刺足小指爪甲上與肉交者各一痛立已不  
已則刺外踝下三痛左取右右取左如食頃是  
也  
其二取足手陽明治頸前痛經云足陽明  
之脉所生病者頸腫又云手陽明之脉是動則  
病頸腫皆視盛虛寒熱陷下取之也

心痛胃脘痛

膈痛  
心虛

或問丹溪言心痛卽胃脘痛然乎曰心與胃各  
一藏其病形不同因胃脘痛處在心下故有當  
心而痛之名豈胃脘痛卽心痛者哉歷代方論  
將二者混同敘於一門誤自此始蓋心之藏君  
火也是神靈之舍與手少陰之正經邪皆不得  
而傷其受傷者乃手心主包絡也如包絡引邪  
入於心之正經藏而痛者則謂之真心痛必死  
不可治夫心統性情始由怵惕思慮則傷神神



傷藏乃應而心虛矣心虛則邪干之故手心主  
包絡受其邪而痛也心主諸陽又主血是以因  
邪而陽氣鬱伏過於熱者痛陽氣不及惟邪勝  
之者亦痛血因邪泣在絡而不行者痛血因邪  
勝而虛者亦痛然方論雖有九種心痛曰飲曰  
食曰風曰冷曰熱曰悸曰蟲曰疰去來其因固  
多終不得聖人之旨豈復識六淫五邪不一之  
因哉且五藏六府任督支脉絡於心藏府經脉  
挾其淫氣自支脉乘於心而為痛者必有各府

藏病形與之相應而痛如靈樞謂厥心痛與背  
相控善瘦如從後觸其心傴僂者腎心痛也厥  
心痛腹脹胸滿心尤痛甚胃心痛也厥心痛痛  
如以錐針刺其心心痛甚者脾心痛也厥心痛  
色蒼蒼如死狀終日不得太息肝心痛也厥心  
痛卧若徒居心痛間動作痛益甚色不變肺心  
痛也更以陽明有餘上歸於心滑則病心疝又  
心痛引少腹滿上下無定處溲便難者取足厥  
陰心痛腹脹齧然大便不利取足太陰心痛短



氣不足以息取手太陰心痛引背不得息刺足少陰不已取手少陽與夫內經於六氣五運司上下勝復淫邪應歲氣盛衰而相乘者亦必有諸淫氣之病狀與心而痛是故苟不能徧識諸藏府所從來之病因將何以施治哉胃脘痛亦如心痛有不一之因蓋胃之真濕土也位居中焦稟沖和之氣多氣多血是水穀之海爲三陽之總司五藏六府十一經脉皆受氣於此是以足之六經自下而上凡壯則氣行而已胃脘弱

則着而成病其沖和之氣變至偏寒偏熱因之水穀不消停留水飲食積真氣相搏爲痛惟肝木之相乘者尤甚胃脘當心而痛上支兩脇裏急飲食不下膈咽不通食則爲食痺者謂食已心下痛吐出乃止又腎氣上逆者次之逆則寒厥入胃亦痛夫如是胃脘之受邪非止其自病者多然胃脘逼近於心移其邪上攻於心爲心痛者亦多若夫心痛之病形如前所云者則詳矣今欲分胃脘不一病因之狀當何如曰胃之



濕土主乎痞故胃病者或滿或脹或食不下或嘔吐或吞酸或大便難或瀉利面色浮而黃者皆是胃之本病也其有六淫五邪相乘於胃者大率與前所列心痛之形狀相類但其間必與胃本病參雜而見之也活法機要云諸心痛者皆少陰厥陰氣上衝也有熱厥心痛者身熱足寒痛甚則煩躁而吐額自汗出知其爲熱也其脉浮大而洪當灸太谿及崑崙謂表裏俱瀉之是爲熱病汗不出引熱下行表汗通身而出

者愈也灸畢服金鈴子散則愈痛止服枳朮丸去其餘邪也有大實心中痛者因氣而食卒然發痛大便或秘久而注悶心胸高起按之愈痛不能飲食急以煮黃丸利之利後以藁本湯去其邪也有寒厥心痛者手足厥逆而通身冷汗出便溺清利或大便利而不渴氣微力弱急以朮附湯溫之寒厥暴痛非久病也朝發暮死急當救之是知久病無寒暴病非熱也丹溪云凡心膈痛須分新久若明知身受寒氣口喫寒



物而得者於初得之日當與溫散或溫利之  
溫散謂治身受寒氣於外者如陳無擇麻黃桂  
枝湯治外因心痛之類是也 溫利謂治口食  
寒物於裏者如仲景九痛丸潔古煮黃丸治大  
實心痛之類是也 病得之稍久則成鬱矣鬱  
則蒸熱熱則生火若欲行溫散溫利寧無助火  
添病耶由是方中多以山梔仁爲熱藥之向導  
則邪易伏病易退正氣復而病安矣 大槩胃  
口有熱而作痛非山梔不可須薑汁佐之多用

台芎開之 金匱要畧云心中寒者其人病心  
如噉蒜狀劇者心痛徹背背痛徹心譬如蠱注  
其脉浮者自吐乃愈 心痛徹背背痛徹心烏  
豆赤石脂丸主之 胸痺不得卧心痛徹背者  
栝萸薤白半夏湯主之 心胸中大寒痛嘔不  
能飲食腹中寒上衝皮起出見有頭足上下痛  
而不可觸近大建中湯主之 心中痞厥逆心  
懸痛桂枝生薑枳實湯主之 右仲景方大抵  
皆溫散之劑有寒結而痛者宜之 左脉浮弦



或緊兼惡風寒者有外邪宜藿香正氣散或五積散加薑葱之類 外吸涼風內食冷物寒氣客於腸胃之間則卒然而痛者二陳草果乾薑吳茱萸扶陽助胃湯草薏蔻丸之類 心膈痛曾服香燥熱藥復作復却轉轉深痼宜山梔子炒黑二兩川芎香附鹽水浸炒各一兩黃連酒炒黃芩酒炒木香檳榔各二錢五分赤麴番降香各五錢芒硝一錢為細末生薑汁童子小便各半盞調二錢痛時呷下 仲景云按之心下滿痛者此

為實也當下之宜大柴胡湯凡脉堅實不大便腹滿不可按並可承氣湯下之 有實積者脉沉滑氣口緊盛按之痛宜小胃丹津下十五丸亦可服厚朴丸紫苑丸 痰積作痛星半安中湯海蛤丸 火痛清中湯 心膈大痛攻走腰背發厥嘔逆諸藥不納者就吐中以鵝翎探吐之以盡其痰積而痛自止 外臺治卒心痛黃連八兩水七升煮五升絞去渣溫服五合日三肘後治卒心痛龍膽草四兩酒三升煮一升



半頓服 仲景云心傷者其人勞役卽頭面赤而下重心中痛而自煩發熱臍跳其脉弦此爲心藏所傷也可服妙香散錢氏云心虛者炒鹽補之圖經衍義謂蠟粉治心痛皆心傷之正藥也 以物拄按而痛者挾虛以二陳湯加炒乾薑和之 按之痛止者爲虛宜酸以收之勿食辛散之劑 又有病久氣血虛損及素作勞羸弱之人患心痛者皆虛痛也有服大補之劑而愈者不可不知 氣攻刺而痛宜加味七氣湯

沉香降氣散正氣天香散治心痛但忍氣則發者 死血作痛脉必澀作時飲湯水下或作呃壯人用桃仁承氣湯下弱人用歸尾川芎牡丹皮蘇木紅花玄胡索桂心桃仁泥赤麴番降香通草大麥芽穿山甲之屬煎成入童便酒韭汁大劑飲之或失笑散 蟲痛面上白斑唇紅能食或食卽痛或痛後便能飲食或口中沫出上半月蟲頭向上易治下半月蟲頭向下難治先以雞肉汁及糖蜜飲之引蟲頭向上用集効丸



或萬應丸剪紅丸之類下之。若因虻作痛虻  
攻嚙心痛有休止其人吐虻或與之湯飲藥餌  
轉入轉吐蓋緣物入則虻動虻動則令人惡心  
而吐用川椒十數粒煎湯下烏梅丸。仲景云  
虻蟲為病令人吐涎心痛發作有時毒藥不止  
甘草粉蜜湯主之為脾受肝制而急故蟲不安  
用粉蜜之甘緩以安之。有腎氣逆上攻心以  
致心痛用生韭研汁和五苓散為丸空心茴香  
湯下。病人舊有酒積食積痰積在胃脘一遇

觸犯便作疼痛挾風寒參蘇飲加薑葱挾怒氣  
二陳加青皮香附薑汁炒黃連挾飲食二陳加  
炒山梔麴蘖草果山查挾火熱者二陳加枳實  
厚朴薑汁炒黃連山梔加減越鞠丸川芎蒼朮  
香附神麴貝母炒梔子砂仁草果參酌脉病施  
治。服寒藥多致脾胃虛弱胃脘痛宜溫胃湯  
寒濕所客身體沉重胃脘痛面色痿黃宜木  
桂湯。心脾痛用荔枝核為末每服一錢熱醋  
湯調下。劉寄奴末六錢玄胡索末四錢薑汁



熱酒調服効。白礬辰砂糊丸好醋吞下神効。  
 心胃腹脇散痛二陳加蒼朮諸香藥治之或  
 沉香降氣散不愈則和其血。熱飲痛黃連甘  
 遂作丸服之。冬寒停飲桂黃散。心極痛以  
 生地黃汁調麩煮喫打下蟲積効。實痛者手  
 不可近六脉沉細甚有汗大承氣加桂強壯痛  
 甚者加桃仁附子連小腹虛寒作痛小建中湯  
 寒熱嘔吐而痛脉沉弦大柴胡湯。脾虛積  
 黃而痛胃苓湯。胃虛感冷而痛理中湯。肉

傷發熱不食胃口作痛補中益氣湯加草薹葱  
 熱痛加梔子。肥人心脾胃腕當心痛或痞氣  
 不食用草薹葱炒三稜白朮各一兩白苳蔻仁  
 桂枝小草遠志莪朮丁香皮木香藿香炊餅  
 丸梧桐子大薑湯下三五十九。胃腕停濕者  
 温中丸。脾胃不和而痛大安丸。因氣者加  
 減木香檳榔丸。效逆上氣痰飲心痛海蛤粉  
 煨瓜萆仁帶穰等分爲末和勻米糊丸。丹溪  
 治許文懿公因飲食作痰成心脾痛後觸風雪



心經胃脈痛  
卷之四  
三十四  
腿骨痛醫以黃芽歲丹烏附治十餘年艾灸萬  
計又胃寒而痛加勝難開合脾疼時勝稍輕勝  
痛則脾疼止此初因中脘有食積痰飲續胃寒  
濕鬱遏經絡氣血不行津液不通痰飲注入骨  
節往來如潮湧上則為脾疼降下則為勝痛須  
湧泄之以甘遂末一錢入猪腰子內煨食之連  
泄七行足便能步後嘔吐大作不食煩躁氣弱  
不語記金匱云無寒熱而短氣不足以息者實  
也其病多年鬱結一旦泄之徒引動其猖獗之

勢無他制御之藥故也仍以吐劑達其上焦次  
第治及中下二焦連日用瓜蒂黎蘆苦參等藥  
俱吐不透而噦躁愈甚乃用附子尖三枚和漿  
水以蜜飲之方大吐膠痰一大桶以朴硝滑石  
黃芩石膏連翹等一斤濃煎置井中極冷飲之  
四日服四斤後腹微痛二便秘脉歇至於卯酉  
時予謂卯酉為手足陽明之應此乃胃與大腸  
有積滯未盡當速瀉之諸醫惑阻乃作紫雪三  
日服至五兩腹減稍安後又小便閉痛飲以**蘿**



心脾胃院痛  
三十五  
荀子汁得吐立通又小腹滿痛以大黃牽牛等  
分水丸服至三百丸下如爛魚腸者二升許脉  
不歇又大便逆痛小腹滿悶又與前丸藥百粒  
腹大絞痛腰膝重眼火出不言語瀉下穢物如  
相油條一尺許肛門如火以水沃之自病半月  
不食不語至此方啜稀粥始有生意數日平安  
自嘔吐至安日脉皆平常弦大次年行倒倉法  
全愈一治一人以酒飲牛乳患心痛年久無汗  
醫多以丁附羸弱食減每痛以物拄之脉遲弦

而瀉又苦吞酸以二陳加苓連白朮桃仁郁李  
仁澤瀉每日服之湧出酸苦黑水并如爛木耳  
者服至二百餘貼脉瀉退至添純弦而漸充滿  
時令暖意其欲汗而血氣未充以參朮歸芍陳  
皮半夏甘草痛緩與麻黃蒼朮芎歸纔下咽忽  
運厥須臾而甦大汗痛止一童子久瘧方愈  
心脾痛六脉伏痛減時氣口緊盛餘部弦而實  
意其宿食詢之果傷冷油麩食以小胃丹津嚥  
下十餘粒禁餘食三日與藥十二次痛止後又



與穀太早忽大痛連脇乃禁食亦不與藥蓋宿食已消今因新穀與餘積相逆而痛若再藥攻必傷胃氣至夜心嘈索食先以白朮黃連陳皮丸服之以止其嘈此非饑也乃餘飲未了因氣而動耳若與食復痛詢其饑作膈間滿悶又與前丸子一晝夜不饑而昏睡後少與粥漸安一婦因久積憂患後心痛食減羸瘦渴不能飲心與頭更換而痛不寐大便燥結以四物加陳皮甘草百餘貼未效予曰此肺久爲火所鬱氣

不得行血亦畜塞遂成汚濁氣壅則頭痛血不流則心痛通一病也治肺當自愈遂效東垣清空膏例以黃芩細切酒浸透炒赤色爲細末湯下頭稍汗十餘貼汗漸通身而愈因其膝下無汗瘦弱脉濇小便數大便澀當補血以防後患以四物湯加陳皮甘草桃仁酒芩服之愈一婦春末心脾疼自言腹脹滿手足寒時膝須綿裹火烘胸畏熱喜掀露風涼脉沉細濇稍重則絕輕似弦而短渴喜熱飲不食以草苳蔻仁三



倍加黃連滑石神麴爲丸以白朮爲君茯苓爲  
佐陳皮爲使作湯下百丸至二斤而安一婦  
形瘦色嫩味厚幼時曾以火烘濕鞋濕氣上襲  
致吐清水吞酸服丁香熱藥時作時止至是心  
疼有痞塊畧吐食脉皆微弦重似瀆輕稍和與  
左金丸三四十粒薑湯下三十餘次食不進予  
曰結已開矣且止藥或思飲與水間與青綠丸  
脉弦漸添與人參酒芍藥引金瀉木漸思食若  
大便秘以生芍藥陳皮桃仁人參爲丸與之又

以蜜導便通食進一老人心腹大痛昏厥脉  
洪大不食不勝一味攻擊之藥用四君子加川  
歸沉香麻黃服愈東垣治一婦人重娠六箇  
月冬至因慟哭口吸風寒忽病心痛不可忍渾  
身冷氣欲絕曰此乃客寒犯胃故胃脘當心而  
痛急與草苳蔻半夏乾生薑灸甘草益智仁之  
類或曰半夏有小毒重娠服之可乎曰乃有故  
而用也岐伯曰有故無殞故無殞也服之愈  
滑伯仁治一婦人盛暑洞泄厥逆惡寒胃脘當



心而痛自腹引脇轉爲滯下嘔噦不食人皆以中暑霍亂治之益甚脉三部俱微短沉弱不應呼吸此陰寒極矣不亟溫之則無生意遂以薑附三四進間以丹藥脉稍有力厥逆漸退更服薑附七日而安也厥心痛者他藏病干之而痛皆有治也真心痛者心藏自病而痛故夕發旦死旦發夕死無治也然心藏之經絡有病在標者其心亦痛而有治經云心手少陰之脉是動則病嗑乾心痛渴而欲飲又心主手少陰之脉

所生病者心痛掌中熱皆視盛虛熱寒陷下取之又經云手心主之別名曰內關去腕二寸出於兩筋之間實則心痛取之兩筋間也又云邪在心則病心痛喜悲時眩仆視有餘不及調其俞是也

**卒急心痛**若脉洪大而數其人火熱盛者用前黃連龍膽草單方飲之若無熱者荔枝核之類治之若中惡心痛腹脹大便不通者走馬湯治之 海上方急救男子婦人心疼牙關緊急欲死者用隔年陳葱白三五根去皮鬚



葉搗爲膏將病人口幹開用匙將膏送入咽喉  
用香油四兩灌送下油不以多少但得葱下喉  
其人必甦一方用香油頓服一盞亦妙經云  
邪客於足少陰之絡令人卒心痛暴脹胸脇支  
滿無積者刺然骨之前出血如食頃而已不已  
左取右右取左病新發者五日已  
**膈痛與心**  
痛不同心痛則在岐骨陷處本非心痛乃心支  
別絡痛耳膈痛則痛橫滿胸間比之心痛爲輕  
痛之得名俗爲之稱耳諸方稱爲煩躁忪悸皆

其證也五苓散瀉心小腸之熱恐非其對不若  
用四物湯十全大補湯去桂生血而益陰此以  
水制火之義 膈痛多因積冷與痰氣而成宜  
五膈寬中散或四七湯加木香桂各半錢或搗  
脾湯加木香膈痛而氣上急者宜蘇子降氣湯  
去前胡加木香如數 痰涎壅盛而痛者宜小  
半夏茯苓湯加枳實一錢間進半硫丸  
**心瘧**  
亦痰飲所致俗名飲瘧有胃口熱食易消故瘧  
素問謂之食瘧亦類消中之狀俗名肚瘧痰氣



宜小半夏茯苓湯加枳實一錢胃中熱宜二陳湯加黃連一錢或五苓散去桂加辰砂亦有病瘥呷薑湯數口或進乾薑劑而愈此膈上停寒中有伏飲見辛熱則消予讀中秘書時館師韓敬堂先生常患膈痛診其脉洪大而濇予用山梔仁赤麴通草大麥芽香附當歸川芎煎湯加薑汁韭汁童便竹瀝之類飲之而止一日勞倦忍饑痛大發亟邀予至火房問曰晨起痛甚不能待公服家兄藥藥下咽如刀割痛益甚

胸痛

心痛條有膈痛痞條有胸痛痺宜與此條參看

經云南風生於夏病在心俞在胸脇又云仲夏善病胸脇此則胸連脇痛屬心肝虛則胸痛引背脇肝實則胸痛不得轉側喜太息肝著則常欲蹈壓其胸經云春脉如弦其氣不實而微此謂不及令人胸痛引背下則兩脇脹滿此肝虛而其脉證見於春如此也宜補肝湯金匱云肝中寒者兩臂不舉舌本燥喜太息胸中痛不得轉側食則吐而出汗也肝著其人常欲



踏其胸上先未苦時但欲飲熱旋覆花湯主之  
 素問曰陽明所謂胸痛短氣者水氣在藏府  
 也水者陰氣也陰氣在中故胸痛少氣也輕者  
 五苓散重者用張子和法取之 脉經云寸口  
 脉沉胸中引脇痛胸中有水氣宜澤漆湯及刺  
 巨闕瀉之 水 杜壬治胸脇痛徹背心腹痞滿  
 氣不得通及治痰欬大栝蓰去穰取子熟炒連  
 皮研和麩糊為丸如桐子大米飲下五十丸  
 斗門方治胸膈壅滯去痰開胃用半夏洗淨焙

乾搗羅為末生薑自然汁和為餅子用濕紙裹  
 於慢火中煨令香熟水一盞用餅子一塊如彈  
 丸大入鹽半分煎取半盞溫服 丹溪治一  
 人鼻有一點相引痛吸氣皮覺急用滑石一兩  
 桃仁半兩枳殼炒一兩黃連炒半兩甘草炙二  
 錢為細末每服錢半以蘿蔔汁煎熟飲之一日  
 五六次又治一人因喫熱補藥又妄自學吐納  
 以致氣亂血熱嗽血消瘦遂與行倒倉法今嗽  
 血消瘦已除因喫炒苳米膈間有一點氣梗痛



似有一條絲垂映在腰與小腹亦痛大半偏在  
左邊此肝部有汚血行未盡也用滑石一兩黃  
丹三錢枳殼一錢黃連五錢生甘草二錢紅花  
一錢柴胡五錢桃仁二兩爲細末每服一錢半  
以蘿蔔汁煎沸服之 胸痛連脇脇支滿膺背  
肩胛兩臂內亦痛經云歲火太過則有此證其  
脉若洪數宜用降火涼劑 胸痛引背兩脇滿  
且痛引少腹經謂歲金太過與歲土不及風木  
大行而金復則有此疾是爲金邪傷肝宜用補

肝之劑 胸中痛連大腹小腹亦痛者爲腎虛  
宜先取其經少陰太陽血後用補腎之藥 胸  
連脇肋解膝外皆痛爲膽足少陽木所生病詳  
盛虛熱寒陷下取之 手心主之筋其病當所  
過者支轉筋前及胸痛息賁治在燔針劫刺以  
知爲數以痛爲輸又足太陽之筋足少陽之筋  
痛皆引胸痛治在燔針劫刺以知爲數以痛爲  
輸也



腹痛

或問腹痛何由而生曰邪正相搏是以作痛夫  
經脉者乃天真流行出入藏府之道路也所以  
水穀之精悍爲榮衛行於脉之內外而統大其  
用是故行六氣運五行調和五藏灑陳六府法  
四時升降浮沉之氣以生長化收藏其正經之  
別脉絡在內者分守藏府部位各司其屬與之  
出納氣血凡是榮衛之妙用者皆天真也故經  
曰血氣人之神不可不謹養養之則邪弗能傷



矣失之則榮氣散解而諸邪皆得從其藏府所  
虛之舍而入客焉入客則氣停液聚爲積爲痰  
血凝不行或瘀或畜脉絡皆滿邪正相搏真氣  
迫促故作痛也脾胃内含心腹心肺内含胸膈  
兩脇肝内含肱脇小腹腎内含小腹腰脊大小  
腸衝任皆在小腹此藏府所通之部位也曰舉  
痛論敘腹痛一十四條屬熱者止一條餘皆屬  
寒後世方論因盡作風冷客之攻擊而作痛今  
子乃云諸邪何哉曰方論不會通諸篇之旨因

不解篇末復謂百病皆生於氣列九氣之狀其  
間雖不言痛必亦爲或有作痛者故也不然何  
乃出於諸痛篇之末耶試以靈樞百病始生篇  
觀之其旨則顯然矣所論邪有三部風雨傷於  
上清濕傷於下傷於上者病從外入內從上下  
也次第傳入舍於輸之時六經不通或着絡脉  
或着經脉或着輸脉或着伏衝之脉或着腸胃  
之膜原皆得成積而痛傷於下者病起於足故  
積之始生得寒乃生厥乃成積厥氣生足惋惋



生脛寒脛寒則血脈凝滯血脈凝滯則寒氣上入於腸胃入於腸胃則臍脹腸外之汁沫迫聚不得散日以成積傷於藏者病起於陰故卒然多食飲則腸滿起居不節用力過度則絡脈傷陽絡傷則血外溢血外溢則衄血陰絡傷則血內溢血內溢則後血腸胃之絡傷則血溢於腸外腸外有寒汁沫與血相搏則并合凝聚不得散而積成矣卒然外中於寒若內傷於憂怒則氣上逆氣上逆則六輸不通溫氣不行凝結蘊

裏而不散津液瀋滲着而不去而積皆成矣自今觀之此篇所謂成積作痛未至於癥瘕結塊之積乃汁沫聚而不散之積也與舉痛論所謂血氣稽留不得行而成積同也豈七情敘於篇末者之不同然於作痛乎然推原二篇之意百病始生篇在乎三部之邪會而為痛故相連而為言舉痛論在乎其邪各自為病所以獨引寒淫一者亦為寒邪之能閉塞陽氣最甚故也用是為例其他則可自此而推之矣至如七情之



氣逆卽傷其榮衛而不行榮衛不行則液聚血凝及飲食用力過度者亦然皆不待與寒相會始成積作痛也且如諸篇有言胃氣實而血虛其脉與散者當病食痺胃食則痛也有言歲土太過濕淫所勝大腹小腹痛者有言衝脉之病其氣溢於大腸而着於膏肓之原在臍下故環臍而痛有言脾傳之腎少腹寬熱而痛有言肝熱病者腹痛身熱有言腎虛者亦大腹小腹痛有言厥陰之厥小腹腫脹太陰厥逆心痛引背

有言六氣司上下之勝之復等邪各隨其所入之部分而痛豈非諸邪各有自徑入作痛初無與寒相關者耶難經云臍上牢若痛心內證也臍下牢若痛腎內證也臍右牢若痛肺內證也臍左牢若痛肝內證也方論之未備者不獨此而已至若厥心痛五邪相乘者亦不能推及四藏與之無異豈五五二十五陽之相移獨心而已哉更於五藏之疝不干涉於畢凡止在腹中痛者猶未明也止知諸脉急者爲疝未知脉滑



微有熱者亦病疝也其詳備見疝條且劉河間嘗解急脉之意急脉固是寒之象然寒脉當短小而遲非急數而洪也由緊脉主痛急而為痛甚所以痛而脉有緊急者脉為心之所養也凡六氣為病則心神不寧而緊急不得舒緩故脉亦從之而見也欲知何氣之為病者適其緊急相兼之脉而可知也如緊急洪數則為熱痛之類也此論可謂善推脉理病情者也曰諸邪之作痛則聞命矣然其邪之博也奈何以治將亦

有所守要約之方乎曰自博而求約何患約之無其道不自博而從事於約約必失其道失其道寧無實實虛虛誅伐無過之患乎然其道要在於審經脉氣血之虛實辨六淫五邪之有無兼氣於是擇至真大要諸治法中併五鬱者之所當施而後選其經分祛邪補正適所宜之藥配君臣佐使以為方夫如是而約之則猶約囊也無不切中其病矣東垣云夫心胃痛及腹中諸痛皆因勞力過甚飲食失節中氣不足寒



邪乘虛而入客之故卒然而作大痛經言得炅則止炅者熱也以熱治寒治之正也然腹痛有  
 部分藏府有高下治之者亦宜分之如厥心痛者乃寒邪客於心包絡也前人以良薑芎藭大  
 辛熱之味末之酒調服其痛立止此直折之耳  
 真心痛者寒邪傷其君也手足青至節甚則旦  
 發夕死夕發旦死中脘痛者太陰也理中建中  
 草薺蔻丸之類主之臍腹痛者少陰也四逆薑  
 附禦寒湯之類主之少腹痛者厥陰也正陽散

回陽丹當歸四逆湯之類主之雜證而痛者苦  
 練湯酒煮當歸丸丁香練實丸之類主之是隨  
 高下治之也更循各藏部分穴俞而灸刺之如  
 厥心痛者痛如針刺其心甚者脾之痛也取之  
 然谷太谿餘藏皆然如腹中不和而痛者甘草  
 芍藥湯主之如傷寒悞下傳太陰腹滿而痛者  
 桂枝加芍藥湯主之痛甚者桂枝加大黃湯主  
 之夏月肌熱惡熱脉洪疾而痛者黃芩芍藥湯  
 主之又有諸蟲痛者如心腹懊懷作痛聚往來



上下行痛有休止腹熱善渴涎出面色乍青乍  
 白乍赤嘔吐水者蛇咬也以手緊按而堅持之  
 無令得脫以針刺之久持之蟲不動乃出針也  
 或局方化蟲丸及諸蟲之藥量虛實用之不可  
 一例治也 海藏云秋腹痛肌寒惡寒脉沉微  
 足太陰足少陰主之桂枝芍藥湯 中脘痛太  
 陰也理中建中黃芪湯之類 臍腹痛少陰也  
 四逆真武附子湯之類 小腹痛厥陰也重則  
 正陽散回陽丹之類輕則當歸四逆湯之類

太陰傳少陰痛甚者當變下利而止 夏腹痛  
 肌熱惡熱脉洪疾手太陰足陽明主之芍藥黃  
 芩湯治腹痛脉洪數 肚腹痛者芍藥甘草湯  
 主之稼穡作甘甘者已也曲直作酸酸者甲也  
 甲已化土此仲景妙方也 脉緩傷水加桂枝  
 生薑 脉洪傷金加黃芩大棗 脉瀦傷血加  
 當歸 脉弦傷氣加芍藥 脉遲傷火加乾薑  
 丹溪云有寒有熱有食積有濕痰有死血  
 綿綿痛而無增減欲得熱手按及喜熱食其脉



遲者寒也當用香砂理中湯或治中湯小建中湯五積散等藥若冷痛用溫藥不効痛愈甚大便不甚通當微利之用藿香正氣散每服加官桂木香枳殼各半錢吞下來復丹或用蘇感丸不利則量虛實用神保丸時痛時止熱手按而不散其脉洪大而數者熱也宜二陳平胃炒芩連或四順清涼飲黃連解毒湯神芎丸金花丸之類若腹中常覺有熱而痛此爲積熱宜調胃承氣湯感暑而痛或洩利併作其脉必虛

豁宜十味香薷飲六和湯感濕而痛小便不利大便溏洩其脉必細宜胃苓湯痰積作痛或時眩暈或嘔冷涎或下白積或小便不利或得辛辣熱湯則暫止其脉必滑宜二陳加行氣之劑及星半安中湯食積作痛痛甚欲大便利後痛減其脉必弦或沉滑宜二陳平胃加山查神麴麥芽砂仁草果溫中丸枳朮丸保和丸木香檳榔丸之類酒積腹痛用三稜蓬朮香附官桂蒼朮厚朴陳皮甘草茯苓木香檳榔主



之多年敗田螺殼煨存性加三倍於木香檳榔  
 丸中更加山茵陳等分其効甚速 氣滯作痛  
 痛則腹脹其脉必沉宜木香順氣散 死血作  
 痛痛有常處而不移其脉必瀋或芫宜桃仁承  
 氣湯虛者加歸地蜜丸照以緩除之或用牡丹  
 皮江西紅麴麥芽香附川通草穿山甲番降香  
 紅花蘇木山查玄胡索桃仁泥酒童便各一鍾  
 煎至一鍾入韭汁服 七情內結或寒氣外攻  
 積聚堅牢如杯心腹絞痛不能飲食時發時止

發即欲死宜七氣湯 腹痛有作止者有塊耕  
 起往來者吐清水者皆是蟲痛或以雞汁吞萬  
 應丸下之或以椒湯吞烏梅丸安之 金匱要  
 畧問曰病腹痛有蟲其脉何以別之師曰腹中  
 痛其脉當沉若弦反洪大故有蛇蟲 關上脉  
 緊而滑者蛇毒 脉沉而滑者寸白 肘後麤  
 以下三四寸熱者腸中有蟲 脾胃虛而心火  
 乘之不能滋榮上焦元氣遇冬腎與膀胱之寒  
 水旺時子能令母實致肺金大腸相輔而來尅



心乘脾胃此大復其讐也經曰大勝必大復故  
皮毛血脉分肉之間元氣已絕於外又大寒大  
燥二氣併乘之則苦惡風寒耳鳴及腰背相引  
胸中而痛鼻息不通不聞香臭額寒腦痛目時  
眩目不欲開腹中爲寒水反乘痰唾涎沫食入  
反出腹中常痛及心胃痛脇下急縮有時而痛  
腹不能努大便多瀉而少秘下氣不絕或腸鳴  
此脾胃虛之極也胸中氣亂心煩不安而爲霍  
亂之漸膈咽不通噎塞極則有聲喘喝閉塞或

日陽中或暖房內稍緩口吸風寒則復作四肢  
厥冷身體沉重不能轉側不可回顧小便溲而  
時燥以草苴菹丸主之此主秋冬寒涼大復氣  
之藥也 復氣乘冬足太陽寒氣足少陰腎水  
之旺子能令母實手太陰肺實反來侮土火木  
受邪腰背胸膈閉塞疼痛善噎口中涎目中泣  
鼻中流濁涕不止或有息肉不聞香臭咳嗽痰  
沫上熱如火下寒如水頭作陣痛目中流火視  
物眈眈耳鳴耳聾頭并口鼻或惡風寒喜日陽



夜卧不安常覺痰塞咽不通口無滋味兩脇  
縮急而痛牙齒動搖不能嚼物腰臍間及尻臀  
膝足寒冷陰汗前陰冷行步欹側起居艱難掌  
中寒風痺麻木小便數而晝多夜頻而少氣短  
喘喝少氣不足以息卒遺失無度婦人白帶陰  
戶中大痛牽心而痛鰲黑失色男子控辜牽心  
陰陰而痛面如赭色食少大小便不調煩心霍  
亂逆氣裏急而腹皮色白後出餘氣腹不能努  
或腸鳴膝下筋急肩胛大痛此皆寒水來復火

土之讐也以神聖復氣湯主之 季秋心腹中  
大痛煩躁冷汗自出宜益智和中丸 季秋客  
寒犯胃心胃大痛不可忍者麻黃草苴蔻丸  
脾胃虛寒心腹滿及秋冬客寒犯胃時作疼痛  
宜厚朴湯爲戊火已衰不能運化又加客氣聚  
爲滿痛散以辛熱佐以苦甘溫以淡泄之扶持  
胃氣以期平也 腹痛或大便利或用手重按  
痛處不痛者爲虛宜於已上治寒痛方中選用  
之無寒者芍藥甘草湯 仲景云虛勞裏急腹



中痛小建中湯主之此補例也溫例也痛而秘者厚朴三物湯主之此瀉例也寒例也三陰受邪於心臍少三腹疼痛氣風等證當歸丸主之失笑散治心腹痛効心痛門有劉寄奴玄胡索方亦治腹痛皆通理氣血之劑也有全不喜食其人本體素怯弱而又加以腹冷疼者養胃湯以人參白朮蒼朮仍加桂茱萸各半錢木香三分應腹冷痛或心脾疼者加生薑均治之諸寒作痛得炷則止者熨之用熟艾半斤

以白紙一張鋪於腹上紙上攤艾令勻又以葱數枝批作兩半片鋪於艾上再用白紙一張覆之以慢火熨斗熨之冷則易之覺腹中熱腹皮暖不禁以帛三搭多縫帶繫之待冷方解一法用鹽炒布裹熨痛處神効腹痛證治上條列之詳矣但有因別病而致痛者不可不明且如疝致腹痛必是罌丸腫疼牽引而痛或邊有一條衝腹而痛霍亂腹痛必吐利兼作甚有不嘔不利四肢厥冷痛極者名乾霍亂又名攪腸



沙急用樟木煎湯大吐之或用白礬末一錢清湯調服探吐之或用台芎為末每一錢許入薑汁半盞熱湯調服甚者面青昏倒不省人事急以鼠矢一合研為細末滾湯調澄清通口服之或刺委中并十指出血腸内生癰亦常腹痛但小便數似淋脉滑數身甲錯腹皮急按之濡如腫狀或遶臍生瘡治法見本門凡此數證要當審辨隨其所因而施治毋苟且而誤人也

**少腹痛**

傷寒畜血在下焦宜抵當丸桃仁承

氣之類若因氣鬱而痛以青皮主之寒者以桂

枝吳茱萸溫之

苦練丸

酒

若因疝奔豚癥聚

者更檢本門施治若身甲錯腹皮急按之濡如腫狀或遶臍生瘡者小腸癰也急宜下之或以雲母膏太乙膏作丸服

**脈**

脈多細小緊急

滑為痰

弦為食

陰

弦或緊或尺緊而實或伏者可下

細小遲者

生 堅大疾者數而緊者浮大而長者死 痛而喘臍下或大痛人中黑色者不治



脇痛

或問脇痛從肝治復有可言者乎曰肝病內舍  
肱脇而脇痛也則何異於心肺內舍膺脇而痛  
者哉若謂肝實病而肱脇痛也則何異於肝木  
不及陽明所勝之肱脇痛者哉若謂由是厥陰  
肝經所過而痛也則何異於足少陽手心主所  
過而脇痛者哉若謂獨經脉挾邪而痛也則何  
異於經筋所過而痛者哉豈執一說而可已乎  
非察色按脉徧識各經氣變雖在一病之中而



辨其異狀者卒不能也且夫左右者陰陽之道  
路也是故肝生於左肺藏於右所以左屬肝肝  
藏血肝陽也血陰也乃外陽而內陰也右屬肺  
肺主氣肺陰也氣陽也外陰而內陽也由陰陽  
互藏其左脇多因留血作痛右脇悉是痰積作  
痛其兩脇之病又可一槩而言乎若論其致病  
之邪凡外之六淫內之七情勞役飲食皆足以  
致痰氣積血之病雖然痰氣固亦有流注於左  
者然必與血相搏而痛不似右脇之痛無關於

血也 戴云傷寒助脇痛屬少陽經合用小柴胡  
湯痛甚而不大便者於內加枳殼若尋常脇痛  
不係正傷寒時身體帶微熱者本事方中枳殼  
煮散用枳殼桔梗細辛川芎防風各四分乾葛  
錢半甘草一錢若只是脇痛別無雜證其痛在  
左爲肝經受邪宜用川芎枳殼甘草其痛在右  
爲肝經移病於肺宜用片薑黃枳殼桂心甘草  
此二方出嚴氏濟生續集加減在人又有肝膽  
經停痰伏飲或一邊脇痛宜用嚴氏導痰湯痰



結成癖間進半碗丸蓋枳殼乃治脇痛的劑所以諸方中皆不可少曾見潘子先說有人脇痛下青龍湯痛止兼嗽得可此其痛必在右脇故也灼然知是寒氣作痛枳實理中湯爲宜 挾外感風寒有表證宜芎葛湯 中脘不快腹脇脹滿香橘湯 腹脇疼痛氣促喘急分氣紫蘇飲 悲哀傷肝氣引兩脇疼痛枳殼煮散 右脇痛推氣散 左脇痛枳芎散或柴胡踈肝散 死血者日輕夜重或午後熱脉短瀆或花桃

仁承氣湯加鼈甲青及柴胡芎歸之屬 若跌撲脇痛者亦是死血宜復元活血湯破血散瘀湯 怒氣者脉弦實有力大劑香附合芎歸之屬 痰飲停伏者脉沉弦滑導痰湯加白芥子 戴云停飲脇痛本事方麩丸最佳 食積痛凡痛有一條扛起者是也用保和丸或吳茱萸炒黃連神麩麥芽山查蓬朮三稜青皮發寒熱脇痛覺有積塊當歸龍薈丸 經云肝病者兩脇下痛引少腹善怒又云肝氣實則怒左關必



弦實鼓擊獨大於諸脉知肝火盛也龍薈丸治  
肝實脇痛其人氣收者善怒是也甚則用薑汁  
吞下經云風木淫勝治以辛涼是也 因驚傷  
肝脇痛桂枝散 仲景云脇下偏痛發熱其脉  
弦緊此寒也以溫藥下之宜大黃附子湯 煮  
黃丸治脇下痙瘳痛如神 控涎丹治一身氣  
痛及脇走痛痰挾死血加桃仁泥凡脇有痰流  
注二陳加南星川芎蒼朮實者控涎丹下之  
枳實散攻中有補虛人可用 戴云曾有人脇

痛連膈進諸氣藥并自大便導之其痛殊甚  
用辛熱補劑下黑錫丹方愈此乃虛冷作痛愈  
疎而愈虛耳 肝氣不足兩脇下滿筋急不得  
太息四肢厥冷發搶心腹痛目不明了爪甲枯  
口面青宜補肝湯 左脇偏痛久宿食不消并  
目眵眊昏風淚出見物不審而逆風寒偏甚宜  
補肝散 肝虛寒脇下痛脹滿氣急目昏濁視  
物不明其脉遲弱者宜檳榔湯 肝氣虛視物  
不明兩脇脹滿筋脉拘急面色青小腹痛用山



芎藭當歸山藥黃芪五味子木瓜川芎各一兩  
半熟地黃白朮各一兩獨活酸棗仁各四銖爲  
末每三錢七棗二枚水一盞煎取八分空心服  
房勞過多腎虛羸怯之人胸膈之間多有隱  
隱微痛此腎虛不能約氣氣虛不能生血之故  
氣與血猶水也盛則流暢少則壅滯故氣血不  
虛則不滯既虛則鮮有不滯者所以作痛宜用  
破故紙之類補腎芎歸之類和血若作尋常脇  
痛治卽殆矣 一人六月途行受熱過勞性又

躁暴忽左脇痛皮膚上一片紅如碗大發水泡  
瘡三五點脉七至而弦夜重於晝醫作肝經鬱  
火治之以黃連青皮香附川芎柴胡之類進一  
服其夜痛極且增熱次早視之皮膚上紅大如  
盤水泡瘡又加至三十餘粒醫教以小調白礬  
末敷仍於前藥加青黛龍膽草進之夜痛益甚  
脇中如鈎摘之狀次早視之紅已及半身矣水  
泡又增至百數乃載以詢黃古潭爲訂一方以  
大瓜萹一枚重一二兩者連皮搗爛加粉草二



錢紅花五分進藥少頃卽得睡比覺已不痛矣  
蓋病勢已急而時醫執尋常瀉肝正治之劑又  
多苦寒愈資其燥故病轉增劇水泡瘡發於外  
者肝鬱旣久不得發越乃侮所不勝故皮膚爲  
之潰也瓜萸味甘寒經云泄其肝者緩其中且  
其爲物柔而滑潤於鬱不逆甘緩潤下又如油  
之洗物未嘗不潔此其所以奏効之捷也歟  
九靈山房集云里鍾姓者一男子病脇痛衆醫  
以爲癰也投諸香薷桂之屬益甚項彥章診其

脈告曰此腎邪病法當先溫利而後竭之投神  
保丸下黑溲痛止卽令更服神芎丸或疑其太  
過彥章曰向用神保丸以腎邪透膜非全竭不  
能引導然巴苳性熱非得芒硝大黃蕩滌之後  
遇熱必再作乃大泄數出病已彥章所以知男  
子之病者以陽脈弦陰脈微澀弦者痛也澀者  
腎邪有餘也腎邪上薄於脇不能下且腎方惡  
燥今以燥熱發之非得利不愈經曰痛隨利減  
殆謂此也 雲中秦文山掌教平湖與家兄同



官每患脇痛遇勞忍餓則發介家兄書來求方  
予爲處以人參黃芪白朮當歸川芎地黃牛膝  
木瓜山茱萸石斛薏苡仁酸棗仁柏子仁桃仁  
之屬令常服之後來謝云自服藥後積久之疾  
一朝而愈不復發矣聞魏崑溟吏部亦以勞餓  
得脇痛無大病也而醫者投以枳殼青皮破氣  
之藥痛愈甚不數日而殞予故著之以爲世戒

**診**

合腋張脇者肺下肺下則居賁迫肺善脇  
下痛 青色麤理者肝大肝大則逼胃迫咽則

苦膈中且脇下痛 凡脇骨偏舉者肝偏傾肝  
偏傾則脇下痛 揭唇者脾高脾高則眇引季  
脇而痛 寸口脉弦者卽脇下拘急而痛其人  
嗇嗇惡寒也 脉雙弦是兩手俱弦也沉瀦是  
鬱細緊或弦者怒氣







